

Službeni glasnik BiH, broj 10/17

Na osnovu čl. 17. i 22. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), Vijeće ministara Bosne i Hercegovine, na 86. sjednici, održanoj 20. decembra 2016. godine, donijelo je

ODLUKU

O OSNIVANJU KOMISIJE ZA KOORDINACIJU PITANJA MLADIH U BOSNI I HERCEGOVINI

Član 1. (Predmet odluke)

Ovom odlukom osniva se Komisija za koordinaciju pitanja mladih u Bosni i Hercegovini koja djeluje u okviru Ministarstva civilnih poslova Bosne i Hercegovine (u daljem tekstu: Komisija).

Član 2. (Sastav, imenovanje i mandat)

(1) Komisija se sastoji od sedam članova, od kojih su četiri predstavnici institucija vlasti u Bosni i Hercegovini, a tri člana predstavnici omladinskih nevladinih organizacija iz Bosne i Hercegovine.

(2) Komisiju čine predstavnici iz sljedećih institucija vlasti u Bosni i Hercegovini:

a) Ministarstvo civilnih poslova Bosne i Hercegovine, pomoćnik ministra u Sektoru za obrazovanje, jedan član,

b) Federalno ministarstvo kulture i sporta, pomoćnik ministra u Sektoru za mlade, jedan član,

c) Ministarstvo porodice, omladine i sporta Republike Srpske, pomoćnik ministra u Resoru za mlade, jedan član,

d) Odjel za stručne i administrativne poslove u Vladi Brčko distrikta Bosne i Hercegovine, šef Pododjela za podršku mjesnim zajednicama i nevladinim organizacijama, jedan član.

(3) Komisiju čine predstavnici sljedećih omladinskih nevladinih organizacija iz Bosne i Hercegovine:

a) Vijeće mladih Federacije Bosni i Hercegovine, predsjednik, jedan član,

b) Omladinski savjet Republike Srpske, predsjednik, jedan član,

c) Predstavnik omladinskog nevladinog sektora s područja Brčko distrikta Bosne i Hercegovine, jedan član.

(4) Članovi Komisije se imenuju na mandatni period od četiri godine sa mogućnošću reizbora.

(5) Članove Komisije na prijedlog Ministarstva civilnih poslova Bosne i Hercegovine imenuje posebnom odlukom Vijeće ministara Bosne i Hercegovine.

(6) Člana Komisije iz stava (3) tačke c) ovog člana predlaže Odjel za stručne i administrativne poslove u Vladi Brčko distrikta Bosne i Hercegovine, a na osnovu provedenog javnog poziva.

(7) Ako imenovani član Komisije prestane obavljati dužnost u instituciji vlasti/omladinskoj nevladinoj organizaciji koja ga je delegirala, njegov mandat u Komisiji prestaje važiti, a institucija vlasti/omladinska nevladina organizacija je dužna u roku od 30 dana Ministarstvu civilnih poslova Bosne i Hercegovine delegirati novog predstavnika u Komisiju.

(8) Novoimenovani član Komisije iz stava (7) ovog člana se imenuje na mandatni period do isteka mandata svim članovima Komisije.

Član 3. (Opći i posebni uvjeti kandidata)

Delegirani predstavnik omladinskih nevladinih organizacija iz Bosne i Hercegovine za člana Komisije mora ispunjavati sljedeće opće i posebne uvjete:

a) opći uvjeti:

- da je državljanin Bosne i Hercegovine,
- da nije mlađi od 18 i stariji od 30 godina i
- da protiv njega nije pokrenut krivični postupak.

b) posebni uvjeti:

- aktivno znanje jednog stranog jezika,
- znanje rada na računaru,
- najmanje godinu dana iskustva u implementaciji omladinskih projekata, i
- najmanje godinu dana radnog iskustva ili djelovanja u omladinskoj organizaciji na području Bosne i Hercegovine.

Član 4. (Predsjednik i potpredsjednici)

(1) Komisija ima predsjednika i dva potpredsjednika. Predsjednik je član Komisije ispred Ministarstva civilnih poslova Bosne i Hercegovine. Potpredsjednici su članovi Komisije ispred Federalnog ministarstva kulture i sporta i Ministarstva porodice, omladine i sporta Republike Srpske.

(2) Administrativno-stručne poslove za potrebe Komisije obavlja referent za administrativno tehničke poslove Komisije za koordinaciju pitanja mladih u Bosni i Hercegovini.

Član 5. (Održavanje sjednica i način donošenja odluka)

(1) Komisija održava sjednice najmanje jednom mjesečno, a svoje odluke donosi na sjednicama dvotrećinskom većinom.

(2) S ciljem preciznijeg definiranja načina rada Komisija će donijeti Poslovnik o radu kojeg potpisuje predsjednik Komisije i koji stupa na snagu danom potpisivanja.

Član 6. (Program rada i izvještavanje)

(1) Vijeće ministara Bosne i Hercegovine usvaja godišnji program rada Komisije.

(2) Komisija godišnji izvještaj o radu podnosi Vijeću ministara Bosne i Hercegovine.

Član 7. (Finansiranje)

(1) Komisija se finansira iz Budžeta institucija Bosne i Hercegovine i međunarodnih obaveza Bosne i Hercegovine.

(2) Članovima Komisije, predstavnicima omladinskih nevladinih organizacija iz Bosne i Hercegovine će se isplaćivati dnevnice i putni troškovi za dane kada prisustvuju sjednicama Komisije i borave na službenim putovanjima iz budžeta Komisije, shodno posebnoj odluci koju donosi Vijeće ministara Bosne i Hercegovine.

(3) Sredstva za rad Komisije (uredski, drugi potrošni materijal, usluge printanja i distribucije materijala) osiguravaju se iz budžeta Komisije.

(4) Za realizaciju svojih aktivnosti Komisija može angažovati konsultantske kuće, stručnjake ili druga lica.

Član 8. (Nadležnosti Komisije)

Komisija je stalno i najviše savjetodavno tijelo uspostavljenim strukturama za koordinaciju omladinskog sektora u Bosni i Hercegovini, koja svojim djelokrugom rada i odgovornostima ne zadire u ustavne i zakonske odgovornosti nadležnih organa vlasti na svim nivoima odlučivanja.

Član 9. (Zadaci Komisije)

Zadaci Komisije su da:

- a) analizira, procjenjuje stanje, napredak i potrebe cjelokupnog omladinskog sektora u Bosni i Hercegovini;
- b) predlaže nadležnim organima strateške reformske prioritete u omladinskom sektoru;
- c) daje preporuke za usklađivanje zakonodavstva u Bosni i Hercegovini u oblasti mladih;
- d) procjenjuje stanje implementacije međunarodnih konvencija i deklaracija u oblasti mladih koje je prihvatila Bosna i Hercegovina, te potiče donošenje mjera za unaprijeđenje stanja i bolju saradnju sa međunarodnim organizacijama;
- e) daje savjete i preporuke Ministarstvu civilnih poslova Bosne i Hercegovine u oblasti mladih;
- f) prati aktivnosti svih međunarodnih programa i projekata pomoći koji se implementiraju u oblasti mladih u Bosni i Hercegovini, razmatra izvještaje o aktivnostima i rezultatima i daje savjete i preporuke za uspješnu koordinaciju svih projekata i programa i njihovu konzistentnost sa domaćim politikama u oblasti mladih;
- g) saraduje sa drugim uspostavljenim strukturama u oblasti mladih po svim pitanjima od značaja za koordinaciju omladinskih politika;
- h) organizira info dane, konferencije, obuke, treninge, seminare i sl. u oblasti mladih;
- i) promovira i podržava saradnju, međusobno informiranje, razmjenu stručnjaka, iskustava i dobre prakse između nadležnih entitetskih, kantonalnih vlasti i vlasti Brčko distrikta Bosne i Hercegovine, te drugih institucija i tijela u oblasti mladih;
- j) analizira međusektorsku saradnju i saradnju sa nevladinim sektorom.

Član 10. (Prestanak važenja prethodnih odluka)

Stupanjem na snagu ove odluke prestaje da važi Odluka o osnivanju Komisije za koordinaciju pitanja mladih u Bosni i Hercegovini ("Službeni glasnik BiH", br. 3/05, 43/09, 62/13), Odluka o imenovanju članova Komisije za koordinaciju pitanja mladih u Bosni i Hercegovini ("Službeni glasnik BiH", br. 79/13), Odluka o imenovanju predstavnika omladinskih nevladinih organizacija u Komisiju za koordinaciju pitanja mladih u Bosni i Hercegovini ("Službeni glasnik BiH", br. 67/15) i Poslovnik o radu Komisije za koordinaciju pitanja mladih u Bosni i Hercegovini ("Službeni glasnik BiH", br. 55/10).

Član 11.
(Stupanje na snagu)

Ova odluka stupa na snagu danom donošenja i objavljuje se u "Službenom glasniku BiH".

VM broj 347/16
20. decembra 2016. godine
Sarajevo

Predsjedavajući
Vijeća ministara BiH
Dr. **Denis Zvizdić**, s. r.